

Resolución da Dirección Territorial da Consellería do Mar da Coruña pola que se comunica o emprego da lista aberta para o incremento do número de cotas de captura para as embarcacións incluídas no Plan de xestión do recurso específico PERCEBE, modalidade dende embarcación, da Confraría de pescadores de Fisterra

Antecedentes

1. O 20.04.2021 esta dirección territorial ditou a Resolución pola que se fixo pública a lista aberta elaborada no procedemento de incremento de cotas de captura para as embarcacións incluídas no Plan de xestión para o recurso específico percebe, modalidade dende embarcación, da Confraría de pescadores de Fisterra (en diante plan de xestión).

2. O 06.06.2024 esta dirección territorial ditou a Resolución pola que se fixo uso da lista aberta e se outorgou unha cota á única embarcación que formaba parte dela; a embarcación NATI (CFPO 56392).

3. A Orde do 19 de decembro de 2024 aprobou os plans de xestión para recursos específicos e algas en Galicia para o trienio 2025-2027 (DOG Núm. 251, de 31.12.2024).

De conformidade co expediente de aprobación do plan de xestión (PE410A 2024/9-1), estableceuse un número máximo de 9 embarcacións con 23 tripulantes habilitados con dereito a cota para todo o trienio 2025-2027.

Trala finalización do último proceso de renovación de 2024 desta modalidade na entidade para o trienio 2025-2027, o número de embarcacións con percebe no permiso de explotación autorizadas para participar no plan era de 7 embarcacións e 15 habilitacións.

4. A embarcación CHULI (CFPO 56804) solicitou a súa inclusión a lista con data 14.06.2024.

5. O 27.02.2025 esta dirección territorial ditou Resolución pola que se incluíu a embarcación CHULI (CFPO 5684) na lista para o incremento do número de cotas de captura para as embarcacións incluídas no plan de xestión do recurso específico PERCEBE, modalidade dende embarcación, da confraría de pescadores de Fisterra, coa súa





puntuación provisional e dando un prazo de 15 días para formular alegacións á dita puntuación.

Transcorrido o dito prazo sen que se presentara ningunha alegación, o 25.03.2025 esta dirección territorial dita a Resolución pola que se actualiza a lista aberta para o incremento do número de cotas de captura para as embarcacións incluídas no plan de xestión do recurso específico PERCEBE, modalidade dende embarcación, da confraría de pescadores de Fisterra (Anexo I desta resolución).

6. O 07.03.2025, logo da petición da confraría de pescadores de Fisterra, esta dirección territorial convocou o proceso selectivo para o outorgamento da modalidade de PERCEBE ao abeiro do plan de xestión da confraría de pescadores de Fisterra, a dúas (2) embarcacións coa única asignación posible de dúas (2) cotas de captura para cada embarcación.

O proceso rematou co outorgamento da modalidade de PERCEBE ás embarcacións A TALIEIRA (CFPO 100314) e TRICHA (CFPO 57160) logo da Resolución desta dirección territorial do 15.05.2025.

7. Na actualidade o número de embarcacións con percebe no permiso de explotación autorizadas para participar no plan é de 9 embarcacións e 19 habilitacións e o 11.09.2025 (registro de entrada 2025/2490011) a confraría de pescadores de Fisterra *solicita que se saque a concurso coa maior brevidade posible (ano 2025) unha (1) cota facendo para elo uso da lista aberta.*

Consideracións legais e técnicas

1. A Orde do 30 de decembro de 2015 pola que se regula a explotación dos recursos específicos no ámbito da Comunidade Autónoma de Galicia, establece nos artigos 39 a 46 o procedemento para o incremento do número de cotas de captura para as embarcacións incluídas nun plan de xestión. No seu artigo 39 establece un sistema de lista aberta para o incremento do número de cotas de captura para as embarcacións incluídas nun plan de xestión na que a orde de prelación das embarcacións virá determinado pola puntuación obtida trala aplicación do baremo previsto no artigo 43.1.

2. A Resolución do 20.04.2021 desta dirección territorial creou a lista aberta para o incremento do número de cotas de captura para as embarcacións incluídas no plan de xestión e o 25.03.2025 ditouse Resolución pola que se actualizou a lista aberta

3. As solicitudes valoráronse de acordo co baremo aprobado pola Resolución do 4 de maio de 2016, da Dirección Xeral de Desenvolvemento Pesqueiro, pola que se aproba o baremo para acceder ás modalidades de recursos específicos no permiso de explotación das embarcacións, así como para elaborar as listas e actualizar os méritos para o incremento do número de cotas de captura para as embarcacións incluídas nun plan de xestión de recursos específicos, modificada pola Resolución do 18 de maio de 2020, da Dirección Xeral de Desenvolvemento Pesqueiro.

4. Na actualidade o número de cotas existentes é de 19 en 9 embarcacións, polo que hai catro (4) cotas vacantes.





O plan de xestión non contempla un número máximo de habilitacións por embarcación pero a embarcación NATI (CFPO) xa dispón de tres (3) cotas de captura no seu permiso de explotación e un máximo de tres (3) tripulantes autorizados no seu certificado de conformidade, polo que non se lle pode ofertar ningunha nova cota de captura.

5. No artigo 46 da Orde do 30 de decembro de 2015, regúlase o emprego das listas, as ofertas das cotas e as causas da exclusión das ditas listas, indicando que as persoas que non acepten os incrementos ofertados durante dúas veces consecutivas sen causa xustificada non recibirán unha nova oferta durante un prazo de doce (12 meses).

6. No caso de renunciar aos incrementos ofertados durante tres (3) veces consecutivas sen causa xustificada, perderán os seus dereitos e a embarcación quedará excluída da lista por un período de dezoito (18) meses, podendo solicitar de novo a súa inscrición unha vez transcorrido o dito prazo.

7. A Resolución do 04.05.2016, da Dirección Xeral de Desenvolvemento Pesqueiro, pola que se aproba o baremo para acceder ás modalidades de recursos específicos no permiso de explotación das embarcacións, así como para elaborar as listas e actualizar os méritos para o incremento do número de cotas de captura para as embarcacións incluídas nun plan de xestión de recursos específicos, modificada pola Resolución do 18 de maio de 2020, da Dirección Xeral de Desenvolvemento Pesqueiro, indica no seu anexo I:

- No apartado A.3, que con carácter xeral, para o incremento, o número de cotas asignadas ás embarcacións estará en función das persoas que teñan enroladas, á vista do rol de despachos actualizado da embarcación coa dotación da tripulación enrolada nela e das certificacións profesionais de cada unha delas e considerárase que o rol de despachos está actualizado á data en que a dirección territorial comunique o emprego da lista para o incremento de cotas nas embarcacións.

- No apartado A.4, que o outorgamento de prazas quedará limitado ao número máximo de tripulantes autorizado/as pola Administración marítima.

- No apartado A.8, que en caso de empate na puntuación obtida, resolverase por sorteo en presenza das persoas afectadas pola dita situación.

8. Esta dirección territorial é o órgano competente para a elaboración e o control das listas, así como para a súa actualización e para comunicar o seu emprego de conformidade co establecido na sección 4ª do capítulo III e o artigo 52 da Orde do 30 de decembro de 2015, pola que se regula a explotación dos recursos específicos no ámbito da Comunidade Autónoma de Galicia.

De acordo con todo o anterior, esta dirección territorial

RESOLVE:

1. Comunicar ás persoas armadoras das embarcacións integrantes da lista aberta vixente para o incremento do número de cotas de captura para as embarcacións incluídas no plan de xestión do recurso específico percebe, modalidade a pé e dende embarcación, da confraría de pescadores de Fisterra, o uso da lista para ofertar unha (1) cota.





2. Ofertar unha (1) das cotas vacantes á embarcación que se relaciona a continuación, tendo en conta o número máximo de tripulantes que consta no certificado de conformidade:

Embarcación	Matrícula	Folio	Cotas actuais	Nº máximo tripulantes (certificado conformidade)	Cotas ofertadas
CHULI	VI-1	1997	2	3	1

3. A adxudicación das cotas ofertadas dependerá das persoas que teñan enroladas á vista do rol de despachos da embarcación coa dotación da tripulación enrolada nela e das certificacións profesionais. Para a comprobación disto as persoas armadoras das embarcacións seleccionadas disporán dun prazo de quince (15) días hábiles contados desde o día seguinte ao da publicación desta resolución para presentar a seguinte documentación:

- Escrito debidamente asinado polas persoas armadoras das embarcacións ás que se lles ofertan as cotas, no que se indique o número de cotas que se solicitan, identificando aos tripulantes enrolados que contan coa certificación profesional correspondente.
- Rol de despachos actualizado das embarcacións coa dotación de tripulación enrolada nela.
- Certificación profesional que corresponda ás persoas tripulantes enroladas, agás as expedidas pola Consellería do Mar, de ser o caso. A autorización expresa para a consulta destes datos realizarase empregando o anexo X da Orde do 30 de decembro de 2015.
- Xustificante de ter aboada a taxa correspondente para a expedición do novo permiso de explotación onde quedará reflectido o novo número de cotas.

O artigo 14.2 da Lei 39/2015, do 1 de outubro, do procedemento administrativo común das Administracións Públicas, establece a obriga de relacionarse electronicamente coas Administracións Públicas a, entre outros, ás persoas xurídicas e as entidades sen personalidade xurídica e o artigo 10 da Lei 4/2019, do 17 de xullo, de administración dixital de Galicia, establece a obrigatoriedade para as persoas traballadoras autónomas de relacionarse a través de medios electrónicos no ámbito do sector público autonómico para os trámites e as actuacións que realicen no exercicio da súa actividade profesional. Por tanto, as solicitudes e a documentación indicada, deberán presentarse por vía electrónica a través do formulario normalizado de achega de documentación adicional dispoñible na sede electrónica da Xunta de Galicia (<https://sede.xunta.gal>), dentro do procedemento aberto PE401M. Para a presentación da documentación será necesario identificarse de xeito electrónico mediante calquera dos sistemas de identificación e sinatura admitidos pola sede da Xunta de Galicia.

Se as persoas armadoras dentro do prazo fixado non presentase a documentación ou do exame dela se deducise que carecen dalgún dos requisitos sinalados na base 1.2 da convocatoria, entenderase que non aceptan a oferta do incremento de cotas por desistencia.





De acordo co disposto no Decreto 425/1993, do 17 de decembro e a Orde do 30 de decembro de 2015, a embarcación seleccionada que presentase a documentación dentro do prazo establecido deberá cumprir ademais cos seguintes requisitos para a obtención do incremento da cota asignada:

- a) Non ter sancións firmes en vía executiva en materia de protección de recursos mariños, pendentes de pagamento.
- b) Que a persoa tripulante estea en posesión do certificado profesional correspondente.
- c) A persoa armadora da embarcación non poderá ser titular dun permiso de explotación a pé para recursos específicos, debendo renunciar a este.

Se a persoa armadora non acepta o incremento ofertado durante dúas (2) veces consecutivas sen causa xustificada non recibirá unha nova oferta durante un prazo de doce (12) meses. No caso de renunciar aos incrementos ofertados durante tres (3) veces consecutivas sen causa xustificada, perderán os seus dereitos e a embarcación quedará excluída da lista por un período de dezoito (18) meses, podendo solicitar de novo a súa inscrición unha vez transcorrido o dito prazo.

Contra esta resolución, que non pon fin á vía administrativa, as persoas interesadas poderán interpoñer recurso de alzada ante a conselleira do Mar no prazo dun (1) mes contado a partir do día seguinte ao da publicación, de acordo co establecido nos artigos 30, 121 e 122 da Lei 39/2015 de 1 de outubro, do procedemento administrativo común das administracións públicas.

Esta resolución publicarase no taboleiro de anuncios da dirección territorial da Coruña e na páxina web <http://mar.xunta.gal>.

A resolución tamén se exporá, con carácter informativo, no taboleiro de anuncios da confraría de pescadores de Fisterra.

Esta resolución notifícaselle á confraría de pescadores de Fisterra consonte ao artigo 40 e seguintes da Lei 39/2015, de 1 de outubro.

A directora territorial
María José Cancelo Baquero
(sinatura electrónica)



ANEXO I:

Lista para o incremento do número de cotas de captura para as embarcacións incluídas no plan de xestión de Percebe da Confraría de pescadores de Fisterra

Embarcación	Matrícula	Folio	Embarcación cunha soa cota de captura C.1	Experiencia profesional armador C.2	Habitualidade da actividade pesqueira C.3	Total
NATI	CO-5	2021	0,00	0,40	3,00	3,40
CHULI	VI-1	1997	0,00	0,00	3,00	3,00

Os epígrafes de cada columna son: (de acordo co apartado C do anexo I da Resolución do 4 de maio de 2016, da Dirección Xeral de Desenvolvemento Pesqueiro, pola que se aproba o baremo para acceder ás modalidades de recursos específicos no permiso de explotación das embarcacións, así como para elaborar as listas e actualizar os méritos para o incremento do número de cotas de captura para as embarcacións incluídas nun plan de xestión de recursos específicos, modificada pola Resolución do 18 de maio de 2020, da Dirección Xeral de Desenvolvemento Pesqueiro)

- **TOTAL:** puntos acadados en total.
- **C.1: Embarcacións que só teñen unha cota de captura no plan de xestión: 5 puntos.**
- **C.2: Experiencia profesional no sector da persoa armadora da embarcación.**

Terase en conta que a persoa armadora estivese enrolada como percebeira (con acreditación) en embarcacións que contan coa modalidade nos 2 anos anteriores á data da convocatoria: 0,2 puntos/mes completo. Para as embarcacións que solicitan a inscrición na lista, unha vez confeccionada, entenderase nos 2 anos anteriores á data da entrada da súa solicitude no Rexistro electrónico da Xunta de Galicia.

A puntuación máxima total que se poderá obter nesta epígrafe será de 4 puntos.

- **C.3: Habitualidade da actividade pesqueira.**
- Se a embarcación acredita ter realizado actividade extractiva entre 15-35 % dos días que foron efectivamente autorizados para a extracción dentro do plan de xestión do ano natural inmediatamente anterior: 1 punto.
- Se a embarcación acredita ter realizado actividade extractiva entre 35,01-60 % dos días que foron efectivamente autorizados para a extracción dentro do plan de xestión do ano natural inmediatamente anterior: 2 puntos.
- Se a embarcación acredita ter realizado actividade extractiva superior a un 60,01 % dos días que foron efectivamente autorizados para a extracción dentro do plan de xestión do ano natural inmediatamente anterior: 3 puntos,

Para as embarcacións que solicitan a inscrición na lista, unha vez confeccionada, entenderase o ano natural inmediatamente anterior á data da entrada da súa solicitude no Rexistro electrónico da Xunta de Galicia.

A puntuación máxima total que se poderá obter nesta epígrafe será de 3 puntos.

